



So491

KBCI/Thuso

Regd.No.19134/88
<http://www.kbc.org.in>
NAI/220/99
No-G-4/Regd.Magazine
/KBCThuso/MNP-81

Kum 57 Ihinna

Lhatun/April 2020



Good Friday

NUTE MOPOHNA

MAY EVENTS | Nute Nikho - 10
Penticost Day - 30

"Kapa theng, eini pumkhat ihi bang a amaho jong
pumkhat ahitheina ding un, Nangman amahohi hong in"

John. 17:11



**Chassad Kho Akihahhah nung a Ponbuh noija akhosat nau limlah
KBC President Rev. Tonglet Haokip in Ihamonna thua ahoulimna**



Samsung Dual Camera
Shot with my Galaxy A30



**Yangoulen Baptist Church KBC No 14 Golden Jubilee monolith dedication
Rev. Dr. M. Thongkhosei Haokip General Secretary in ahondoh na.**

Samsung Dual Camera
Shot with my Galaxy A30

CONTENTS

THUMAKAI HO

"CORONAVIRUS LE CHAHSAD"/ <i>Editorial</i>	2
KINEPLEL LAITAH A KINEPNA/ <i>Mr. Jam Haokip</i>	4
CHRISTIAN RESPONSE TO COVIT-19/ <i>Pastor Seikhogin</i>	6
Thingpel Thu/ <i>Rev. Onkho Haokip</i> ,	10
PAKAI THU NUN LE KIPHAL THENGNA/ <i>Rev. Dr. Haoneo Haokip</i>	14
March Thuchinbu	17
Mission Column	21
Youth Column	22
STS Column	23
HETNA BELAP	30
Taona Column	32
Reports	33
Obituary	40

EDITORIAL BOARD

Chairman	: Rev. Tonglet Haokip, President KBC
Editor	: Dr. M. Thongkhosei Haokip, General Secretary
Joint Editor	: Rev. Onkho Haokip
Contributing Editors	: 1. Rev. Thongkholun Touthang 2. Rev. Lamkeng Lhouvum 3. Rev. Tongmang Haokip 4. Pi Lhingbem Haokip 5. Rev. Lunkhosei Tuboi 6. Rev. T. Thangkhosei Haokip
Design & Layout	– Hemkholen Haokip
Circular Manager	– Pi Vahboi Baite
Recorder	– Ms. Nemhoichong Haokip

THUSO LAHMAN

Church/Organisation/ DepartmentRs. 300/-
Individual Rs. 200/- (Post a Rs. 250/-)

Indian Overseas Bank, Imphal Branch

A/c No. 073201000000350 IFSC No. IOBA0000732

The General Secretary,
Kuki Baptist Convention,
Opp. DM College, Imphal 795001, Manipur
email: kbcindia@rediffmail.com

Advertisement bolnom hon Mobile No. 70895979446 Contact thei.
Circulation to kisai lam Mobile No. 9862107393 bol ding.

Editorial...



"CORONAVIRUS LE CHAH SAD"

Editorial

Keima mina kikousa kamite chu ahung kineosah thei yuva taona anei-yuva hitia hi keima angsung ahinhol theiyuva, athilse bolnauva kona akihei manguva ahile, keiman jong vana kona kahin ngaiya achonsetnau kangaidam ding chule agamsungu kadamsah a kaphatsah ding ahi (2 Chron.7:14).

Amasatah in muntina um Kuki Christian chate jouse ahideh a KBC member ho jouse chung a i Pakaiyu Jesu Christa minin salaam kahinpe cheh uve. Tulai tah a Kukiten iboipi penu hi adang tampi umjong le thil ni hin namsung dinmun khohsahna lentah apei: Coronavirus natna le Chahsad khopi kihal Ihah hi ahi.

Coronavirus kiti damlouna khat amin choma Covid-19 chu Wuhan (China) khopi khat a kona hungkon-doh a kisei chu vannoi muntina akithejal tan, Manipur gamsunga tutua damlouva hetchet (confirmed) hi UK lama themjil nungah khat Thangmeiband (Imphal) venga kon chu ahi. Mi hijat lah a khat bou veiya akihet vangin kichat tijat aumdan chu ahile Manipur pumpi kikhah (lock down) hia, India sunga domestic flight jouse nisim 25 March a pat a kikhah a, mipi kititna thei jouse kikhah a, hou-in jeng jong kikhah a ahitai.

Alangkhat ah, Chahsad khopi chu akimvela achenk-hompi Kamjong ten ana hallhauvin, inn 200 vel lhah a inn 10 vel bou ana sohchae. Akoma sepia Assam Rifle hihen Manipur Police ho hijong le, chule District Administration in ima bol louva amoh vet tho jeng u ahi. In kihal jeh hin Chahsad khomite mi 800 vel chu genthei hahsa tah in akhosauvin, Kuki civil society hon nasatah in hitobanga thilbol ho demna aneyun, state government le adanghon apet a kithopina thei yin relief thil adongun, ajing nikho chun escort jaona in gari 40 val kitol in aga kithah e. KBC jong first responder lah a ana kipangin jochana kipang jing ding ahi.

Tuhin Coronavirus jeh hin state government keo hilouva India pumpi lock-down ahitan Chahsad relief ding jeng jong deibangin boipi ahithe i pon akhoh lleh jenge. Alang khat ah, Chahsad mite genthei ding gelna jeh in coronavirus a kona kiven ding jeng jong gelkhohna alhasam kit tai. Gam pumpi (country), state hoa gamgi, kho le kho kikh le in le in kikh ho jong akikah gamin, kichottona thei ahitapoi.

Hiche teni hi phatah a ivet le mihem te lhinalna (chonsetna) jeh a thil hungsoh doh hidingin jong ginchat ahi. Pathen alung lhai lou teng gimna hise kitoh ji ahin, Ama henga kisi a taona iman teng eingaidam diu chule hitobang gimna hoa kona eihoidoh dingu ahi. Lamkai vaibol, haosa upa'n Pathen helouva kingolsahna anei le agenthei chu amaho bou hilouva khosung le lhangsung min jong apothaji ahiye. Pathen bel phat tah ahin, Coronavirus hihen lang namdang tampi le hattah hoa kona Pathen tilou adangin eihuh theiyu ahipoi.

Lungluttah a simjouse chung a Pathen vangboh chang jing taken.

KINEPLEL LAITAH A KINEPNA THUPHON

Mr. Jam Haokip

Faculty, Shalom Theological Seminary.

ARTICLE

Tulai tah a vannoi hotling a mihem jousen aboipi Covid-19 kiti natna gimnei hi amitakip in ihithei lamcheh uvin iboipi uvin ahi. Scientist hon alou 'vaccine' semdoh ding aboipi uvin, government hon lockdown abol uvin, police hon chele vale akham uvin, 'healthcare worker' hon adamlou ho aboipi uvin, CSO hon kivenbitna dinga tohgon ho tosot in pan ala uvin, khomi hon kho le veng lutna lampi akhah uvin, chule bolding helou pen honjong Covid-19 chungchang thu hi atah jong alhem jong athotle athotle jeng uvin ahi. Chule Christian tahsan toh kitoh a Covid-19 chungchang thu social media a viral cheho atamjo'n 'spiritualize' le 'theologize' (quarantine is biblical, repent of your sins, the end is near etc.) ibol nom uvin ahi. Hiche hohi ase e tina jong ahideh pon amabou hicheho kalval a seithei ipi aum dem? tihi ahi.

Covid-19 chungchang thu kisei hohin kipana le lungmonna sanga lhasetna le lunglinglao najoh eipeh u hile akilom in ahi. Ma-sanga banga houin kikai theilou thu, adamlouho le thiho thu, chule Bible a leiset kichai dingkon le thilsoh dingho toh Covid-19 kimehbeh hin thil imudan uhi aphalang sanga aphalou lang 'pessimism' a eilhut thei diuvn aumin ahi. Hiche hin mihem ho panlah najal ahiloule imajouse chung a thunei vaihom Pathen

jal a ahung phatding kinepna ichangei hamkhat in alamang in ahi. Bible a themgao hon amaho 'context' a boina ato hou aseiphong uvin chule hichetoh kilhon chun Pathen thahat jal a boina ho akon akiledoh diu thu jong aphongdoh jiuvin ahi. Hiche hin boina lentah hojeh a kinepna nei talouva lunglhada Israel mipiho lungsung ah kinepna 'hope' lentah akoipeh ji'n thahat ape ji'n ahi.

Kineplel laitah a kinepna thu seiphong ding kiti hi thil hahsa-tah ahiloule thil hitheilou 'paradox' dan in umjongle themgao ho banga seiphong tei dinghi Christian te kin lentah khat chu ahi. Hiti ahijeh chun kinepna thu hi iti iseiphong diuham? tihi igeldiu angai in ahi. Hitia boina ahung umteng vaicha genthei ho aha tohkah pen ji'n ahi. Kinepna hi kinei lhomchek jongle vaicha genthei ho a dingin kinepna hi alhom dehset in ahi (Covid-19 jeh a lungkhamna, nehle chah sil le chen lhahsam jeh a lungkhamna etc.). Bible ivet a hile Pathen in vaicha genthei te angailut dan le alainatpi dan mun tampi'n akimuthei in ahi. Ezekiel 16:49 achun Sodom mite'n anneh aval anei uva, nopsatah a achen uva, ahivanga vaichate le lengvai te akithopi loujeh uva Pathen in akhopi'u chu asuhset ahi akiti'n ahi. Chule Pakai Jesu in mihem khat apenthah le apenthah lou, chule anung jui dinga alhin le alhinlou chu vaicha genthei ho chung a lungput in aphochen ji'n ahi (Mark 10:21-22; Luke 19:8-10). Covid-19 boina akon Christian ihinau hi vaicha genthei ho khoto nale ngailut nalam a iphondoh uva hichu anatoh a ivetsah diu angai in ahi. Hiche hi

vaicha genthei ho dinga kinepna ihinau le Pathen jal a Covid-19 kalval a kinepna aum iphondoh nau ahi.

Vaicha genthei ho panpina thum a mi inn a cheding akiphatlum nau chungchon a 'social distancing' jui dinga hung kiphong hin amaho hi achamlouvin notthap in aumsah in ahi. Natna akon kivenbit nadinga kijui 'social distancing' jeh in khatle khat kah in 'physical distance' koi jongleu hen Pathen cha chule mihem ihi naova 'social solidarity' (pohgih kipoh hu na) hi imansah loudiu angai in ahi. Khosung le veng-sung lutna lampi ho ikhah taove (bolngai lou beh khat), hijongle khosung le vengsung a kingai-lutna le kikhotona vang ikhatan loudiu ahi. Alou theilouvin 'social distancing' hi khaotah in um jongle hiche sanga 'social solidarity' hi ihatsah diu angai in ahi, hichu kinepna neilou ho dinga kinepna lenpen ahitai. Hiti ahijeh chun 'social distancing' iki pangput uva ikom uva genthei hahsa ho ikimumo sah diu ham? ahiloule 'social solidarity' ibol uva eimaho ikivenbit nau chungchon a kinepna neilouho dinga kinepna a igapan diu ham? Hoiche joh hi kibol le pha'nte nati em?



CHRISTIAN RESPONSE TO



COVID-19

CORONAVIRUS OUTBREAK

*Pastor Seikhogin Haokip
Lecturer Shalom Theological College,
Gamnom Sapermeina*

Sermon

THUMAKAI:

Tulai taha vannoi hotling natna gimnei Corona virus (Covid-19) jeh in mitampi lungdong le lungimin aum gamtan, Houin kai asuboiyin jalhang hinkho atongkhan chule themjilna le office ho jouse akikhah in, Government in japi ding ngaitonan curfew, total lockdown le mipi kititkhom. Kikhophkom ho aphil tapon ahi. Hiche ho jouse jehin Christain tampi alungdonin abangin Pathen umlou hitam ? abangin mu-kaneiyin Pathenin hiche bollin khuche bollin tia sei loijong a umin, abangin Bible thupeh guilhung ahi tia Bible chang akito pi le aki lopi ho holdoha sutoa mipi ho hil jong aki umda pon ahi. Adehin hitobang phat le hin-thuhil lhem atam jin ahi. Hiti ahi jeha chu hiche article hin adoile atup chu tahsan chaten hitobang boilaitah a hi iti ium uva ipi iboldiu ham ti point themkhat ana veu hite.

1. KICHA HIH IN KICHIH THEI JON : Corona virus (COVID-19) hi van-noiya natna hit jatkhat bou ahin chutia kichata kithing thinga umdi chu ahi dehpoi. Eiho laha

aboi khat hi corona virus sanga kichatna (fear) hin mitampi imuthei lou netheilou le dontheilou in alha jin ahi. Bible a konna imu uchu- ahileh, Pakaiyin; kicha hih

in keiman kaum pi nai, kicha hih in keiman kalhonpi nai, kicha hih keiman na Pakai kahi (Psalm 56:3, Philipi 4:6-7, Psalm 23:4, Deu 3:22, Mark 6:50 etc). Bible ah hin kicha hih in ti Pakaiya konna kimu hi vel somget (80 times) tobang ahi. Hijeh chun tahsan chate Pakaiya kingai ho dingin imacha kichatna ding

a um poi vannoiya minjouse chungu chungnungpen

chu I Pakai-u- Jesu

Christa min ahin

ama lhalim noiya

kiselte dingin

imacha ki-

chatna ding a

um poi. Ahin

k i c h a t l o u

manna chu

m o h - c h o n

chon moh-va va

ding tina ahipon

chingthei taha hink-

ho imandiu joh ahi.

Chingthei in kihong

phauvin tihi Pathenin mi-

hemte angense na lenpen

khatchu ahi kit e (Eph 5:15, 1

Cor 10:12, Joshua 23:11, Exo

19:5; 23:22, Pro 12:26). Van-

nnoiya mihemte manthahna

hohi ivetle kichihthei loujeh ahi

pen e (vetsahna:Noah khanga

mite le Sodom le Gommorah

mite), Pathen na kison kiti hi

Pathen in eipehu sele pha hetna

pa hi phatah le chingthei taha

manchaha, virus chungchang,

Govt. order, society dinmun ho

phataha hetna hichedungjui ya chu Pathen to ikikah suboilouva natna a konna kivendoh nadia chingthei taha Pathen hatna songa preventive measure ho lah ding tina ahi jon ahi.

2.THU KISEI JOUSE MOHTAHSAN

HIH IN : Tulai vannoi Leiset hi

mihemte dingin kijahmattona (

communication) ahoivaltan ahi

leh-koiham khat touin alupna-

munna alungel khat hamchu

ahin tahdoh jitengle atah tah

abangjin hichu mitampin atah

ham alhem ham kihelouvin ahil-

oule kholtohou louvin iki asuhboi

sahjiuvun ahi. Hijeh chun eiho

dia nasa taha ikivenna diuva

deisah chu social media a konna

thil imu houle ijah-hou hi tahsan

jeng pei louding , chule share le

forward jong bolpei jilou ding

ahi. Vetsahnan Bible kikah a sam-

jang te ho bangchu mijousen ina

musoh diu ahin, ken kamua chu

keima le keima question kaki-

bol chu- koisei ham? Asei pa hi

itobang miham? Tahsan kibahpi

hinam? Bible to kitoh hinam?

Tiho hi kaki dongin ahi. Adeh

in hitobang phatlai le hin thuhil

lhem le aki Pathen misah, hung

tamji mong ahi. Hinla eihon ibol

diu chu- houlang le tahsan lam-

pang to kisai ahile, I Pastor hou

le ilamkai hou idoh diu hiche

thu hi adih hinam atah hinam

tia- Damtheina langto kisai ahi

le doctor ho nurse ho idoh diu

hitia chu alam alam ma expert

ho to iki het touva iboi nahou iki

suhlhep ji diu ahi.

3.PATHEN HOUIN CHU NALUNG-SUNG AHI : "Pathen intheng nahuva nasunguva Pathen lhagao achenchu nahet lou uham" (1Corinth 3:16) " Ahilou jongle Pathenna konna naneiyu Lhagao

Pathen ahouna dingchu hiche mol jong hilou chule Jerusalem jong ahi poi..... ahivangin phat ahunglhunge tuhi ahi, chuteng ahoutahbeh hon Pa-chu lhagao le thutah a ahoudingu ahi" (John 4:21, 23) ana tin ahi. Hijeh chun Pathen dihtah a houna dinga hin mun (place) hi athupi pen ahi poi ,ilungthim u joh hi ahi.

4. JESU LAM VEN LEI-SETTHU HO KIPUI SAH HIH IN: Vannoi Leiset

hi aum laisungsea hi boina toh umkhom jingding ahi. Nat-na jong tua sanga nasa jo-jo ana um ahi tan chule hung um beding ahi nalaiye. Hinlah hitobang boina ho ihin to tengule mitampin christain hojengin jong kibol chu ahi leh boina pajoh hi ina ki control sah jiuvin ahi. Corona virus natsat dan, thahat dan, achalgang dan, adanger dan hohi niseh in isim isim jiuvin ahi leh hichun achai chaina le eiho eihin control jitaubin ahi. Bible simlouva news lelei isim jitengule hichu hung umdoh ji ahi.Hinla Tahsan chaten hitobang phatlai leh ibol diuchu Pathen hatna, Pathen loupina, Pathen milungsetna, Pathen miven bitna, ho joh hi isimuva igeldohuva ikipuisah johdiu ahi. Pakai Jesun Peter tuichunga lamjot dinga akou chun Peter konga patin ana

Theng nalungsunguva chenga chu natahsau hi a inn-theng ahi ti nahet lou uham?" (1 Corinth 6:19) Corona virus natna jehin Government in thupeh tampi aneiyin hicheho laha eiho Houin kajong hi asu boitan ahi. Hichea hin mitam pin Houin kaikhom a umlou phatin Pathen kihou theilou danin inagel jiuvin ahi. Hichu lungput dihlou ahi, ajehchu Pathen chenna chu khuta kisa inn hijo louvin ilungthimu joh hi ahi (1 Cor 3:16-17;6:19) . Pakai Jesun Samaria numei komma chun " Numei nei tahsanin min

kumlan tuichunga chun lam ana jot in ahi. Hichea hin Peter in Jesu lam avet laise chun aboipon tuichunga chun lam ana jot in ahi. Chomkhat jouvin ajet le avei aven ahi le tuichung ahi chu ahin hedoh tan huipi le tuipi kinong ho jehchun Jesu umlam chu ana heimil hintin, tuiya chun ana khelut tan ahi. (Matt 14:29-30). Eiho jong Peter banga Jesu lam velouva vannoi thusoh ho le corona virus chungchang bou ivet uva isim ule corona virus positive hi hih jongleu hen itahsan naule ilungthim pumpiu iconrol sa-

lungnan ni le ima ahi loudan jong eigeldoh sahuvin, mihema din neilegou tampi neijongle Pathen lungnan nile ima ahipoi tijong eigeldoh sahuvin ahi. Hijeh chun muntinna um tahsan chate jouse Pathen to kicham utin Pakai to kilamto din kigo sadem in um uhite. Insung kitem tup loulai hon kitemtup utin, tahsa le lhagao kisu thengin Pakai lam galdot tao hite. Ajeh chu hiche ilenau leiset hi lungmonna thei ahi poi ti ina hetsau hijongle tuchung hin aki chih l'heh jengin ahi. Tua jong seithei louva nangma



hule ale lam a seidia chu mentally a chu covid-19 natna veikhat ihu ahi tai. Ki control sah louding ahi, Pathen joh ki control sahding ahi, Pathen in eiconrol nadia a thu simjingding chule taojingding ahi. chutengle corona virus chungan ilen diu ahi.

THUCHAINA: Tuchung corona virus (COVID-19) hi akilah themte dingin insung kitemtup nale mimal hinkho kitemtup nadia jong phat hoitah ahi. Hiche hin vanoi chihna le thepna hohi Pathen

mitmo nalou beha covid-19 positive nahung hia victim nahung hi jongbailam, keijong kahung hi thei ahi, hijong le corona virus in asuh set theichu hiche thisan le tahsa phe bou ahin nahinna dihtah tonsotna goulo ding chu ima alothei poi- hiche thudol a l Pakai Jesu thuhil chu, "Natahsau thattheiya nalhagaou thatthei lou hochu kicha hih un ahin tahsale lhagao ani nia thatthei pa bouchu kichauvin atin ahi." (Matt 10:28). Asim jouse Pathen in Phatthei boh taken.

Thingpel Thu

Rev. Onkho Haokip,
Development Coordinator

Sermon

Thingpel chi chom chomho

Thingpel kitihi Greek paovin Stauro akiti'n chule Latin paovin Crux akiti'n ahi. Hiche Thingpel'a kikhethbeh hi chonse khat kibol-na ding'a jachat umna chungnungpen ahitai. Thingpel'a kikhethbeh hi kisuhneona nempen'a kigel ahijeh chun Rome mi hina nei khat chu hiti hin akibolji poi. Hetthei ding in, Jesu le Peter chu



Rome mi hina nei ahilhon lou jeh chun khetbeh in ana um lhon in, Paul vang chun Rome mi hina ananei jeh chun ana kikhethbeh pon, alol joh ana kitan in ahi. Kikhethbehna thing (thingpel) chu jat chom jep jep ana um'e.

Kikhethbehna thing masapen chu khomphung khat seh to-bang ahin hichu *Crux simplex* akiti'n alimput dan chu "I" lim tobang ahi. Aninapa chu *Crux Commisa* (St Anthony's Cross) akiti'n, alimput dan chu "T" lim

tobang'a um ahin thing khat chu achung'a avaiya khat ki-jam kit ahi. Athumnapa hi *Crux Decussata* (St. Andrew's cross) akiti'n alimput dan chu "X" lim tobang'a um ahin, thing ni kipelto ahi. Hiche thingpel hi

Peter kikhailihna chu ahi. Alina le achainapa hi *Crux Immissa* akiti'n alimput dan chu "+" lim tobang'a kistem ahi. Hiche hi Jesu kikhethbehna chu ahi (*Matt 27:37; Mk. 15:26; Lk 23: 38; Jn 19:19-22*).

Thingpel kiti poupou hin koudoh anei deh poi, ahinlah akikhenbehpa Jesu Christa jal in koudoh lentah le thuhtah aneidoh in Hinna Thingpel ahung kishodoh in ahi. Ajeh chu hichea thina chun mijouse ahuhdoh ahitai. Hiche thingpel thu hi phat chesa le tukhang, chule khang kit adia manlu pen hijing ding ahi (*Gal. 3:1*). Thingpel thu hi leiset chihna thu toh kikal'a ahi (*I Cor. 1:17-2:5*). Hiche thingpel thu hi Greek mite le Judate ding'a ngolhoi thua kilang ahin (*Gal. 6:12-15*), ahinlah mihema ding'a lhahsamna'a kilang chun Pathen thahatna chu atahlang doh joh ahitai (*I Cor. 1:18*).

Paul chun thingpel loupina hi thucheng chom in akouvin, "lhatdamna" "themchanna" ati'n ahi. Thingpel chung'a man kipe chun vannoi chonset hi asuhdamsoh hel ahitai (*Mk 10:45; I Pet. 1:18*). Mihemte chonsetna jouse chu thingpel chung'a chu kipodoh'a hichea chu Jesu'n asuhbei soh hel'a Pa kom'a lhuntheina ding'a

kot jaotah'a ahondoh ahitai (*1 Pet. 2:24*). Hiche natohna hin Pathen le mihemte kihak (*Col. 1:20*) chule mihem le mihem (chiding namdang le Israelte) kihak'a chamna aso ahi (*Eph. 2:13-16*). Jesu chu Khopi pam lam'a chun akikaidoh in ahi (*Heb. 13:12-13*). Jesu chu thingpel chu akiputsah un ahinlah phat sot tah thisana long ahijeh chu apujou pon, aphaat jong chu Kalchuh Kut toh kinai ahijeh chun agan nathei ding in Africa gam'a Cyrene mi Simon chu aputhu sah un ahi. Hiche Simon hi Alexander le Rufus pa ahi (*Mk 15:21*).

Amahon Jesu chu Aramaic paova *Golgotha* kiti Lugu Mun achun apuidoh un ahi. Hiche mun hi mitampi kithana mun ahijeh'a lugu tamtah um ahin hijeh'a chu Lugumun kiti ahi. Kimkhat in vang chuti chu ahipon, amun amoul umdan joh hi Lugu toh akilo jeh'a Lugu-mun kiti ahi atiuvin ahi. Hoi chu hileh Jesu kithana mun chu anahi. Jesu thingpel leh achun Pilate in "Nazareth Jesu Judate Lengpa" ti'n Hebrew (Hebrew-Aramaic) pao, Greek pao, chule Latin paovin asunin atah doh in ahi. Hiche hi Bible thu kitahdoh (Tract) masapen hiding in tah-

san aum in ahi. Hebrew pao chu Juda miten anatho u ahin, Greek pao chu ahileh chuchelai khang'a Sarkal in anaman ahin, Latin pao chu kailhang dung'a mijouse'n atho le ahethi pao ahi. Mijouse'n ahethi theina tei tei ding'a pao thum'a ana kijih ahi.

Jesu le Thingpel

Thingpel kiti hi adei jong um intin adeilou jong um ding ahi. Hiche Thingpel hi mihem hin gon le gel jeh a Christiante in hung kimang hiponti'n Jesu Christa amatah lungthimma ana umsa joh ahi. Jesu kum 12 alhin'a Jerusalem houin'a anu le apa in aga holdoh pet lhon chun, *"ibol'a keima nei hol uham? Ka pa in a ka um in, ama na ka toh ding ahi,"* ati'n ahi (Lk.2:41-50). Jesu in Pathen akon'a tohdoh ding neiya lei-setna hung ahidan akihet in ahi. Jesu Twilut le Gamthip gam'a lhez patep'a ana um chu Satan thua nun'a nopsahna hinkho hilouvin, Pathen thua nun'a gentheina hinkho man-na ding joh anahi.

Pakai lhacha na ahin toh phat chun Jesu in seijuiho kom'a chun mihon Mihem Chapa ahin suhgenthei diu, ahin dou-dal diu, chule ahin tha ding'u

thu ahinseidoh pan tan ahi (Mk. 8:31-32). Hiche agenthei ding le athina dingho jouse hi Pathen thilgon ahin, kisel theilouhel chu ahitai. Peter in Jesu chung'a thilse lhun ding adeilou vang in hichu Pathen thilgon toh kikal ahijeh in Jesu in aphoh in ahi (Mk. 8:31), ajeh chu Jesu in alampi ahah le abai abonna akihet ahin itobang hi-jongleh akimaitopi tei ding chu ama kiphalna ahi. Hiche akon hin Jesu in agenthei thoh ding le akitha ding thu ase jing tan ahi (Mk. 9:31; 9:51; Matt. 10:17-19; Lk. 18:31-34).

Jesu in athi ding avel avel'a aseidoh hin Seijuiho ding'a kigotna phat akehna ahi. Isaiah lekhabu in Akisugep Lhacha (Is. 53) ati leh Daniel lekhabu in Mihem Chapa (Dan. 7) atiho jong aboncha agui lhun ding jeh in Pathen lekhabua kisun chengse chu guilhung ding ahi ti'n ana sei jing in ahi. James le John anu in Jesu kom'a achan-vou lhon ding ahung thumc-hun Baptize ka chan hi angap lhon ding hinam ti'n ana dong in ahi. Hichu genthei hesoh le thina ato dingho aseidohna ahi. Jesu Christa in lhachana ahintoh apat in ahoulimna tamta'h'a Mihem Chapa kisuh-

genthei ding, mihon apampai ding'u chule akitha ding thu hi lhangphong tah'a asap phong jing khat chu ahi.

Cana khoa moupui golvah achun Jesu in "keima phat alhing hih laiye" anati'n ahi (Jn. 2:4; 7:8). Chule ama chung'a chun khut alha pouvin ahi, ajeh chu ama phat lhinglou lai ahi akiti'n ahi (Jn. 7:25ff). Jesu Jerusalem anununpen'a alut chun, "tun phat ahung lhung'e, mihem chapa loupina ding" ati'n chujouvin ka lung akham tai ati kit in ahi (Jn. 12:20-28). Chuin Indan chung'a aum pet uchun niveijen ase in leisetna ahung'a akile kitna ding phat alhin thu aseidoh in ahi (Jn. 12:27).

Jesu chun leiset mihem dang bang'a nikho khat le ka thi ding ahi tia ahet ahipon, amavang athoh ding jouse le athi ding dan jouse jong ahetsa ahitai. Ama chu Judah sakhoa lamkaiho le mipi in ana doudal ding'u ahi (Mk. 3:6); Ama chu Pathen lekhabu theng in thi ding'a ana sei jeh'a thi ding ahi (Mk. 14:21; Lk. 24:25-27; 44-47); Ama chu mi jouse khel'a athi ding'a hung kipedoh ahijeh'a thi ding ahi (Lk. 19:10; Mk.10:45). Hiti ahijeh hin Ama thina ding hi ahitei tei ding thu ahitan, imacha in

asuhtang joulou ding thu ahitai. Hiche jeh chun Aman athina ding thua hi "Tei" ("Must") kiti thucheng aman jia, "mihem chapa hi thi tei tei ding ahi," tiho ana sei ji ahi.

Mihem chapa hi mihon asuhgenthei tei ding u chule apampai tei ding u ahi. Ama chung chang'a kisun chengse guilhung tei ding ahi. Ama in thina anato chu ama lhahsam jeh le panpi ding mi aneilou jeh ahipon amavang Apa thilgonna atohdoh got jeh le thunun jeh ahin hichu michonsete huhdohna ding jeh ahi. Jesu in ahinkhoa thil tamtah um jongleh ahunglona le agaljona ding mun le phat Thingpel thu hi achungnungpen in akoi jing in ahi. Hiche hi Jesu in Thingpel amudan le apom dan ahi.

Solchahte le Thingpel

Solchate in alekha sutnau atamjoa chun Jesu chu Pathen thu dunguia kisugep'a chujoule thoukit ding ahi dan aha sei un ahi (Acts 2:14-39; 5:29-32; 1 Cor. 15:3-4). Chule Jesu chu thingleh'a akikhai sang'a mihemte ahuhdoh thu jeng ahasei un ahi (Acts 5:30; 10:39; 13:29; 2:23; 4:10; 1 Pet. 2:24). Jesu thodoh thu akisei chan in Jesu thi thu akisei in ahi. Ajeh

chu thina aumlou leh thokitna um thei lou ahi (Act 3:15; 13:28-30; Rom. 6:3; Lk. 24:46-47; 1 Cor. 15:1-5).

Paul chu thildang'a kisong lou-va Thingpel abou kisong ding in asei in ahi (Gal. 6:14). *Peter* chun Jesu Christa thisan mantam tah jeh'a hinna aumdan asei in ahi (1 Pet. 1:18-19; 2:24; 3:18). *John* chun Jesu Christa chu Pathen mihem hung kisoh ahin, ama thisan thengtah jal'a chonset jouse akisuhtheng dan asei doh in ahi (1 Jn. 3:16; 4:9, 10). *Hebrews lekhabu sunpa* chun Jesu chu thil jouse sang'a chungnungjo Ama thisan jal'a khatvei'a mijouse ding'a tonsot hinna hinpedoh ahidan asei in ahi (Heb. 8-10). *John in Thuphon lekhabua* asei dungjui in Jesu chu ahing le athi chung'a thunei le athisan'a mijouse chonset subeipa ti'n asei in ahi (Rev. 1:5; 18; 5:5-6). Vangam'a umho chu namtin vaipi ahiuvin amaho chu Christa thisan'a avon kisop thengho chu hiding'u ahi (Rev. 5:1-6).

Thohhatna le Thingpel

Mihemte in Jesu chu mipi maiya jumso uhen hijongleh Jesu

in vang Thingpel'a natna le jumna jouse athoh jouna ding in akinemthol in ahi (Heb. 6:6; Phil. 2:8). Jesu genthei thohnaho chu Ama ding'a loupina ding anahi kit in ahi. Tahsanna in khonung loupina ding amupha jouvin, tahsanlouna hinkho in lhahdaina bou amupha in ahi (1 Cor. 1:18-25). Islam sakho chun Christa Thingpel'a athi hi apom nom pouvin ahi. Ajeh chu Messiah thina ding in kilom asapouvin chule mihem khat hinna chu midang khat ding jeh'a thi lou ding'a agel'u ahi. Thingpel kiti hi hinkhoa ding'a ijakai kikaigopna ahi.

Mihemhon dem henlang, chule sakho danghon itidem jongleh Thingpel manlutna hi mang deh lou ding ahi. Christian sakho hi akhang akhang in miho dem le seiset in ahung um toupeh in, adihlouna photchenna pea kigel jong tampi aum jing in ahi. Christiante invang hitobang vannoti mite angsung'a iumnauva Thingpel thu hakattah'a isei uva pan ilah khom jing ding'u ahi. Christa thu kisei chu Thingpel ahijeng in, Thingpel thu kisei jong chu Christa ahijeng in ahi.

PAKAI THU NUN LE AMA A DIA KIPHAL THENGNA

(Palm Sunday Sermon)



Rev. Dr. Haoneo Haokip

Director, Shalom Theological Seminary

Lemna

Pakai Jesu Christa a ngailut umtah houbung mite jouse, I-Pakaiyu Jesu Christa minin Palm Sunday, Good Friday le Easter Sunday chibai kahinpeuve!

Thubul phu

Tuchung vannoi losoh CORONA VIRUS (COVID – 19) tia kihe natna hise a kon a kivendohna theipen dia mijouse in cheh a kikul khup/ kikhum tup (Total Lockdown) hinkho iman tah jeh un mi tampin kumdang lhadang banga Palm, Sunday, Food Friday le Easter Sunday programme ho hi deibanga houin kai-khom a kimanchah khomna ineithei tah loudiu tahsan aume. Hijeh chun Palm Sunday to kilhonin chung a hung kitah lang thumun/ thupi hi anasimu hitin, anangaito khomu hite.

Thusim

John sut Kipana Thupa 4:34; 5:30; 6:38 ho ivet le, Pakai Jesu Christa in vannoiya ahung chu ama lung got lam subulhit ding hilouvin ahinsol pa (Pathen) lung got lam (vannoi mihem te huh-hing dinga hung kisol ahina) joh subulhit jo dinga hung ahidan aseina akimun ahi. Hichena ding hin ama (Jesu Christa) chu kineosah tah in thina gei sanin thun anungin ahi (Philp. 2:4-8).

Jesu Christa chun ahung kisol lona na atoh sung chun leiset tahsa lam thuneina le vaihomna thagumin vai ahompon, in le lou neilou, sil le chen ning lhingset a neilou, che le valena ding sakol, sangongsang ahiloule sngan jeng jong neilouvin hitichun alungapna ding mun jeng jong neilouvin kinemse tah in hinkho anamangin ahi (Matt. 8:20). Ahin, eihon tua PALM SUNDAY iti niu nikhoa Jerusalem a alut (Matt. 21:1-16; Mk. 11:1-11; Lk. 19:28-44) chun leng dinga thao kinu (Messiah) ahina le leng ahina photchetna a sangan chungu atou angaitan ahi (sakol chungu tou chu tahsa lam galsat le gal jona lam vetsah ahin, sangan chungu tou hi chamna lam vetsah ahi. Jesu Christa chu chamna lengpa ahi photchetna a sangan chungu atou ngai ahi). Ahin, Jesu Christa chu touna ding sangan jeng jong neilou ahijeh chun atouna dinga amasanguva Bethphage kiti khoa kon a sangan nou khat ahinkai lhon din aseijui mi ni asolin ahi. Aseijui teni jong achelhonin Bethphage kiti khoa kon chun sangan chu ahin kai lhonin, sangan chungu chun aponu aphauvin. jesu chu atouvin ahi. Chuin mipi lah a atamjon lam dunga chun aponu aphauvin, adangsen theoboh alhamun lamdungu chun aphauvin, hiti chun Jesu Christa masanga che le anungjui mipi ho chun, "Hosana, David chapa, Pakai min a hungpa chu anunnome; chungnung pen a Hosana!" tin asam samun ai.

Hiche thusim a kon a gelding le ngaito ding

Jesu Christa chu Pathenin ahin sol lona (huh-hingna) natoh suh bulhitna din kineosah tah in thingpel a thina gei sanin thun anungin ahi. Sangan kai dinga Jesun asol seijui teni jong chu amanna ding man sum le pai ima kipelou, sangan neite chun ahinphal ahinphal lou ding, aning akah thu ima gelkhoh loule phunchel loubeh in a-Pakaipa lhonin asolna lhon thunung tah in ache jeng lhonin ahi. Sangan neite jong chun seijui tenin, 'Pakaiyin manna nom aneiye,' atiu chun itcha louhelin ahinphal doh jengun ahi. Chule mipi hon jong sangan chungu tou Jesu Christa chena dingin itcha louhelin lamlhong dunga aponu aphauvin ahi. Hichehoa hin Pakai Pathen a

dinga thununna le kiphah thengna lentah akimun ahi. Hichehi thusim hi phatah a gel a ngaito din akulin ahi.

Thuchaina

Christian khat hina a nangman jong tuni chan na Christian hinkhoa hi ichan geiya Pakai Pathen thunun nale Pakai Pathen a dinga kiphah thengna nanei tah em? Nangma tahsa lung ngaichatna lungthim suh bulhitna dingle Pathen lungdei lam joh suh bulhitna ding ahung kitato tengle hoilam joh a nachuh ji em? Pakai Jesu Christa Gethsemani hon a nangle kei jal a thoh gim tah le thoh hahsa tah thoh a ul thisan tobanga long leuva ataopet a mihem ahina lunga, adon ding khon (athoh gimna ding) chu ama a kon a Pathenin alah mang dinga (amite huh-hongna dinga lampi dang khat joh agon dinga) atao vingin, ama lungdei lam hilouva, Pathen lung deilam joh subulhit ding joh a hung ahina agelkhoh joh a, "Ahivangin keima lungot bang hilouvin nangma lungot bang hijohen," ati (Matt. 26:39; Mk. 14:36; Lk. 22:42) banga hi nangin jong nati thei ding hinam? Aseijuiho le miphihon aneisunu aponu Jesu Christa touna dingle alam jotna dinga aphaldoh uva atodoh jengu banga nangin jong tuni chan a hi Pakai Pathen a dinga nalung thim, nahinkho le nanei nagou ichan geiya naphal doh khah tah em? Pakai Pathen thununna le ama a dinga kiphah thengna kiti hi Pathen houdol ahi. Jesu Christa ataona a Pathen lung got joh dinga akipeh lhah tah chun Lhagao Thenga konin thahatna achangin ahung kisol lona nangle kei huh-hingna dinga thoh gimna natoh chu ajouvin ahi. Pakai Pathen ihouna a hi athu nunna le ama a dinga kiphah thengna inei jeh a lhasam deh louva Pathen a kon a hanta le jona kichang ding joh ahi, ti hi gel them a Pakai Pathen thu nunna le ama a dinga kiphah thengna hinkho mang jing thei dingin ikitemuvin ahi. Hichehu Pathen houdol tah ahi.

March Thuchinbu



1. March 2: Pentannial Fellowship umna ding mun Khopi-jang-Lonpi Khonou mun'ah Gambih No. 12, 21 le 11 chule Pentannial Fellowship Planning Committee phabep in mun vetlhahna ana kineikhom in ahi.

2. March 10: KBC worker Prayer Fellowship, KBC Chapel Hall, Imphal mun'ah lolhing tah in ana kimangkhom in ahi.

3. March 12: Rev. Ngamjapao Haokip, Former General Secretary le Rev. Paojangam Haokip, Former Mission Secreary in tahsa kum kum somgup chan Pathen na ahintohna Ihon'a Pa-then thangvahna le Pension pehna KBC Chapel Hall mun'ah lolhhin tah in ana kimang in ahi.

4. March 13: KBC sung'a Pakai lenggam na tong ding'a lhacha thah kilahbeho Shalom Theological Seminary mun'a Orientation ana kibolpeh chai'u toh Ihon in, Centre Church Salam Village Sapormaina mun'ah Commissioning Service ana kibol peh tauvin ahi. Hiche nikho chun Pastoral ministry a lut ding mi phabep jong Licentiate ana kibol in ahi.

5. March 16: KBC Chapel Hall mun'ah Office Staff-ho, CEC member-ho le Centre Church Langol Choir-ho toh KBC kiphu-do kal kum 62 alhinna, Foundation Day mankhomna ana um in ahi. Rev. Tonglet Haokip, President in ponlap khaidohna ananeyin, Rev Dr. HawIngam Haokip, Emeritus General Secretary in KBC thusim ase in, Rev. SN Gangte, Former General Secretary in achesamaho geldohna thu aseiyin, Langol Choir in vahchoi la ngeitah tah asauvin chule mipi in taokhomna ana neikhom uvin ahi.

6. March 16: Jinglam nidan 9 apat nilhah lang nidan 2 sun'a

KBC Foundation Day



Chassad Khopi chenkhopmi Kamjong khomite in ahallhah'u thu akijah to Ihon in anikho mama in Rev. Thongsei, General Secretary, Rev. Seiboi Tuboi, Youth Secretary le Rev. Onkho Haokip, Development Coordinator in adelpai uvin ahi. Litan a Police umhon ana solpai lou jeh uvin ahung kinungle uvin ahi.

7.March 16: Chassad kihallhah jeh in nilhah in Office mun'ah Secretary-ho in gelkhomna ana kineiyn, MBC le mundang dang'a lekha thotna le hetsahna March 17 nikho in ana nei tauvin ahi.

8.March 17: Chassad kihallhah jeh in Rev. Tonglet Haokip, President KBC, Rev. Thongkhosei Haokip, General Secretary, Rev. Seiboi Tuboi, Youth Secretary le Rev. Onkho Haokip, Development Coordinator le office staff phabep in Bolero Pick-up gari ni dimset in Relief thil akipo in Chassad khopia nam mite vilna, tilkhouna le taopehna ana kineiyn ahi. Hichea Relief thil kipoho chu houbung mite le mimalho panlahnahoko kipokhom ahin, pan la jouse chung'a kipa thu ipong uve.

9.March 18: Office Secretary chengse in Gambih No 13 vilna ana kineiyn chule Khangbarol mun'a um Dingpi Mission School jong vetlhahna ana nei uvin ahi. Amahon Gambih Ex-

ecutive ho toh toukhomna le taokhomna jong ana mang un ahi.

10.March 19: Office Secretary chengse in Gambih No 13 vilna akineiyin chule Yangoulen Baptist Church, Golden Jubilee Celebration ajong pan aga lauvin ahi. Rev. Rev. Thongkhosei Haokip, General Secretary in Jubilee Song hondohna aneiyin, Pastor Lamkhogin Haokip in Souvenir thesnona ana neiyin ahi.

11.March 19: Office Secretary chengse in Pallel Molnoi'a um Pastor Limminthang Zou, Kidney (Kal) nat jeh'a kum khat vel hung kijen jing chu vilna le taopehna aga nei uvin ahi.

12.March 20: Chassad kihallhah jeh in CEC Emergency ana toukhom in maban'a panlah ding dan le ijakai seikhomna ana um in ahi. Chule Relief lam'a mopo ding in KBC Development Committee ngansea ana kipe in ahi. Hichea kihoulhahna dungjui in KBC houbungho in Relief thil hihen sum hileh KBC Office mun'a kholkhom'a chule ahithei channa houbungho in Houin sahna ding'a jong pan ahinlah cheh ding uvin phat-sahna ana um in ahi.

13.March 25: Corona Virus natna jeh'a India le Vannoi pumpi kikulkhupna phat ahung lhun toh lhon'a KBC houbungho in houin kai le mipi kitikhom chule programme chomchomho vohhai'a chule Pathen thua kitilkhouna hi ama ama houbung dinmun dungjuiya Mic ahilouleh Interner mangcha a panlah-khom ding in General Secretary in thuphon anei tan ahi.

14.March 30: Chassad mun'a KBC Office apat Relief Team chule Missionary/Evangelist jaona a kal son ding'a tohgon um chu Manipur Sarkar in phalna apeh tahlou jeh in vohhai anahitai. Ahin mipi kitollut thei hih jongleh amun'a ijakai sufel ding in Dr. Seilenkap Haokip, Developemt Asst. Coordinator ana kisol in,aman pan nasatah alah jinglai ahi.

Mission Column

Mission Thudol Hetna

KBC Mission natoh na Pathen lungset in amachal jingin Pathen thangvah in um hen. Houbung mite taona leh kithokhom najallin, chuleh tokhompi Mission board ho gun chu najallin March 2020 sung'a jong Mission natohna akimachal jingin Pathen thang vah cheh u hite.

1. MBC Mission Secretary vailhahna: MBC Kivaihom nadol'a MBC Secretary ho term khat kum 5 ahin , hijong leh term ni chan poh thei aumtoh kilhonin Mission Secretary Rev Alani Mission Secretary term ni (2) ahin poh chu achaina ahitoh kilhonin 03/03/2020 nikho chun MBC noiya Association jousea konin Mission Secretaries hon Rev Alani leh family vailhahna akineitan ahi.

2. Pastor Letzalai Singsit thah na leh Saijang Mission school mun ding vilna.

Achesa nisim 4-6th March 2020 sunga hin KBC Gambih No 18 Karbi-anglong Pastor Letzakai singsit Posting thah toh gomin, Amranjan Mission Centre leh Saijang Mission School ding vetlhah na Mission Board Member Pu Haopu Singsit, Pu Neka Vaiphei toh kalsona akinei-jin ahi. Hiche kalsona sunga hin, Pu Khupngam Hangsing , Pu Boipu Thomsong Dimapu, Pu L. Singsit Retd. IPS, chuleh Chumukedima KBA Church ho chuleh KBA Church Kohima ho jong vilna ahung kinei-jin ahi. Rev John Singsit Pastor KBA Kohima Church in ngailutna neitah in Guest house a eilhun sah un ahi.

3. Mission Sunday : Pathen lungset in kum seh'a ina man ji banguvin KBC Mission Week leh Mission Sunday Nisim 8th March nikhon mun chom chom'a Mission Board member ho leh Pakai lhacha ho mun chom chom'a kiman chah na Speaker hina in ina kal songuvin, chuleh Houbung hon jong kipah tah'a eina lemnao chung chonna kilom tah'a Mission week leh Sunday ikiman chah nao chung a kipa thu iphonguvin ahi. Mission natoh na ding'a offering hihen enveloped a hijong leh lung lhaisel'a thilp peh hin nei ho jouse chung'a kipa thu kahin phonge. Pathen in akimang cha Speaker a che ho jouse phat thei boh jing tachen.

4. Mission & Evangelism ho taokhom : Lhaseh'a KBC Mission & Evangelism ho taokhom na chu Pathen lungset in 9th March 2020 chun KBC office chapel Hall akimangin ahi. Meitei field leh Nepali field chuleh eiho Area a Evangelist ho lhaseh a taokhomna chu

hoitah in ache Ihan ahi. Rev Dr. M Thongkhosei Haokip General Secretary KBC Speaker in apangin ahi.

5. Induction & Commissioning service: Nikho 13th March 2020 chun KBC worker thah ho orientation course achaithei na chung a kipa thu seina leh Pathen thangvah khomna aumin chuleh Induction service, Pre-ordination kibol peh na leh commissioning service akineijin, Mission field ding'a jong mi 12 soldoh na akineitan ahi. Tuchung worker thah kila hi atam na pen ahin, KBC thusim'a dia nikho man tam tah khat jong ahitai.

6. Mission Board Tour Program: Pathen lungset in Nisim 14-15th March 2020 sung'a KBC Mission Board Member hon kikim keijin KBC Gambih No. 15 Houbung vilna akineije. Nisim 14th nikhon Moreh 10.30 vellin kalhung taove. Pu Thangsei Touthang & Family Mission Sponsored in sung miten, jing an neh eibol peh un chuleh Maicham semkhomna jong akineijin ahi. Nidan 1.00 pm langin Pu Onjamang Haokip a-ineipi Pi Chinneivah Haokip Mission Sponsored hina in vilina le cha donkhom leh maicham semna akineijin ahi. Nilhah in Pu S Haopao Haokip Mission sponsored hina in an eineh sah un chuleh Maicham sena akineikhom in ahi. Nilhah in Moreh Baptist Church ten Guest house a eikichol do sah uvin nom tah in kichol dona kaneijun ahi.

Sunday ni jing kah in Houbung mun chom chom'a kakimangun, Moreh Baptist Church Rev Lamkeng Speaker in apangin, Kipa umtah khat chu Moreh Baptist Church hin KBC through a Kol (Burma) Myanmar gam'a Missionary mi thum asol taovin ahi. Chuleh member ho houbung chom chom, P. Laijang B/C Pu Athang Haokip, S Canaan Veng B/C & Hindi B/C Pu Thangkholun Haokip, M. Chahnou B/C Pu S. Onkhomang Haokip, C/C Chavangphai Pu Neka Vaiphei, Haolenphai B/C Pu Haopu Singsit, Zion Veng B/C Pu Haojakam Doungel, hiti hin mun chom cheha kakimang chaovin ahi. Meitai Baptist Church a kakimang cha khomun Rev. Lamkeng Speaker apange. Sunday jingkah an neh tuidon abon chan Meitei Baptist Church hone i gon peh un Houbung mite chung a kipa thu kahin phongin ahi.

Sunday nilhah in Khdengthabi Baptist Church a kakimang chaovin, Houbung miten kipah tah in eina lemun kaikhomna na nomtah in kakimang chaovin ahi. Kaikhom kikhen in Ankong umkhom akineijin, 6.20pm donin Imphal lam kahin jonun 8.30 pm a Imphal kahung Ihung taove, Pathen thangvah in um hen.

Khodengthabi Houbung mite hi amah o Mission share apeh nao

chung chona tukum'a patna hi Houbung hi Mission sponsored khat in ahung pang taovin ahi. Amah o hin lhaseh'a Rs. 8000/ (Eight Thousand) ahin peh diu ahitai.

Tuchung Mission Tour kikal sona chung hin Moreh Bandh khoutah ana umin hijong leh lamkai ho leh mipite hetthem na akichan jallin boina um louvin kiman chah na akinei theijin, Hill Tribal Council Moreh lamkai ho leh Mipi ho chung a kipa thu kahin phonge. Chuleh changval hihen Houbung ho chuleh Gambih Pastor Rev Thanglen Haokip le family ho jouse chung a kipa thu kahin phonge. Pathen in KBC Mission natoh phat thei boh jing taken.

BIBLE QUEST 2020



PORTIONS : HOSEA TO MALACHI

LANGUAGE : THADOU-KUKI

EXAM CENTERS : ALL DISTRICTS

TYPE OF QUESTIONS : OBJECTIVE

DATE OF EXAM : 11th OCTOBER 2020, SUNDAY

PRIZES:

TOP 1 : Rs. 15,000 + Memento

TOP 2 : Rs. 10,000 + Memento

TOP 3 : Rs. 7000 + Memento

TOP 4-10 : Leather Cover Holy Bible + Memento

Notes:

1. Koi Houbung mihile athanom jouse pangthei ahi
2. Exam Center hi District jouse le Eimi umna India khopi hoa kikoi ahijeh in nabolna thei ding mun nakilhen thei ahi
3. Application Form Rs. 30/- only napeh a na umna gamkaiya nakilah nathei akikoiye
4. Thuchen hetbe nomhon KBC Youth Secretary Contact thei ahi.

Contact No. +91-8414919588

Youth Column

BQ2020 CHUNGCHANG

Hetsah na le tem na

*Rev. Seiboi Tuboi
Secretary Youth*

Kumsih le anakichepi jing le ana kibol jing Bible Quest hi tukum sung'a din jong imajouse got tup ahito kilhon in BQ Form jong akigongchai tan, hinlah vangset um tah in Corona Virus tia kihe Covid-19 jeh in leiset pumpi adin boina lentah ahung soh tan, hiche to kilhon in Lock-down ahikit jeh in BQ Form jong ahung kithot doh thei tapon phamo akisah lheh jeng'e, hijong le Exam penom ho jouse adia tuhi phat hoipet tah le themvet na dia kigot tup nathei phat kilem pet cha ahijeh in, Hosia pat Malachi chan hi themvet na a lolhin ding deinaseh hilouva eiho lhagao hinkho kisuh hat thei nadin jong iphat neisun in ana simchek u hite tia kahin tem nahiuve. Chule BQ Form hung kithot doh thei hihlai jong le themvet na adia kigot na nasatah a ina nei cheh diu vin muntin na sopi ule nao te ho jouse heng a hetsah na le tem na ahung kineiijin ahi.

Hiche BQ themvet na a pangthei ding ho chu koi tobang bang hiding ham iti le mijouse alen na pat aneo changei pangthei ding ahi. Hiti jeh chun thanom tah le gunchu tah a pan hung latei ding in tem na avellin kahin neiijin ahi. Ija ihet uvam, eiho adia jong tukum hi phat kilempet cha ina neisun u chu himai thei ahi, naphat man tam tah chu Pa-then na din hin pedoh teijin nung le nakisih lou tei nadin. Kakipah'e

Pakai le mipi lhacha
Rev. Lunkhosei Tuboi
Youth Secretary KBC

ORIENTATION COURSE REPORT

Convention Exective Committee (CEC), Kuki Baptist Convention (KBC) toh gon le ngansena dung juiyin achesa 17th February to 13th March, 2020 sung chun Shalom Theological Seminary (STS) mun'ah KBC Workers (Pastors, Missionaries le Evangelist) kila thah ho KBC noiya natong dinga kichuhna (Orientation Course) lolhing tah a anakibol/ le anachelhah to Ihonin achaini (13th March, 2020) nikho chun Training mun (STS) a Closing Ceremony le Course chaina Certificate hop dohna anakibolin, chujouvin Centre Church, Salem Sapormeina'ah Pastoral Committee ho lamkaina'n Pastor dingho Pre-Ordination le natong dingho jouse Commissioning Service loupitah in anakibl tan ahi.

Orientation sunga kihilna ho

1. Understndng Kuki Baptist Convention
2. Understanding kuki Baptist Convention
3. Baptist Theology and Polity
4. Pastoral Care & Counselling
5. Personality Development & Leadership
6. Homiletics
7. Finance Management
8. Practical Ministry 1
9. Practical Ministry 2
10. Christian Ministry in a Multy
Socio-Cultural & Religious Context
11. KBC Road Map
12. Introduction to Mission & Evangelism
13. Cross-Cultural Communication
14. Bible Study Method

Mihil ho

- 1 Rev. Dr Hawlngm Haokip, Emeritus G.S, KBC
- 2 Pu Alun Haolai, Former President, KBC
- Rev. S. Prim Vaiphei, President, AMCO
- Rev. (Dr.) Haoneo Haokip, Director, STS
- Rev. Lamkeng Lhouvum, Mission Secy., KBC
- Rev. Dr. Paul Paolen Haokip, Lecturer, MTC
- Pu Khaijang Haokip, Office Superintendent, KBC
- Rev. Demneh Doungel, Retd. Pastor, KBC
- Rev. Tonglet Haokip, President, KBC
- Rev. Dr. Letthang Haokip, Principal, MTC
- Rev. Dr. M. Thongkhosei Haokip, G.S, KBC
- Rev. Dr. Paotinthang Chongloi, Pastor KBC No. 8
- Pr T. Letkholal Haokip, Pastor, KBC No. 13
- Pr. Ginneo Haokip, Academic Dean, STS

Pastoral Ministry Experience Sharing

1. Rev. N. Baite, Retd. Pastor KBC & Board Chairman, Theological Education, KBC
2. Rev. Tongmang Haokip, Secretary, Men Department, KBC

Mission Field Experience Sharing

1. Rev. Letpu Kipgen, Pastor, Centre Church, Kangpokpi
2. Rev. S. Ibomcha, Supervisor, Meitei Mission Field

Orientation Course (Kihilna) a Pang ho

1. Pr. S. Hemkholen Haokip, Pastor, *Centre Church, Haokip Veng, Imphal*
2. Pr. Thangtinsei Haokip, Pastor, *Centre Church, Leimakhong*
3. Pr. Letkhohao Haokip, Pastor, *Centre Church, Neihsiel Veng, Churachandpur*
4. Pr. David Jangkhogin Chongloi, Pastor, *Centre Church, Haolai Khopi, Ccpur*
5. Pr. Lunlal DOUNGEL, Pastor, *Centre Church, Canaan Veng, Imphal*
6. Pr. Thongchinglen Touthang, Pastor, *Singat Thadou Veng*
7. Pr. Seikholen Kipgen, Pastor, *Centre Church, Molkon Bazar*
8. Pr. Paogoumang (Benjamin) Chongloi, *Pastor, Centre Church, Joujangtek*
9. Pr. Thangminlal Haokip, Pastor, *Gambih No. 5*
10. Pr. L. Letminlal Khongsai, Pastor, *Gambih No. 6*
11. Pr. Th. Letkhoson Haokip, Pastor, *Gambih No. 7*
12. Pr. Lhunkhongam Haokip, Pastor, *Gambih No. 12*
13. Pr. Paominthang Haokip, Pastor, *Gambih No 17*
14. Pr. T. Jamthienlal Haokip, Faculty, *STS*
15. Pr. T. Seikhogin Haokip, Faculty, *STS*
16. Ng. HatMary Haokip, Faculty, *STS*
17. Ng. Preety Lhingneilam Haokip, *Evangelist*
18. Pr. Thanggoumang Haokip, *Medical Chaplain*
19. Gingoumang Kilong, *Missionary (FMPB, UP)*
20. Lenkhohao Haokip, *Missionary (Tripura)*
21. Hemkhochon Haokip, *Missionary (Arunachal)*
22. Jangminlen Vaiphei, *Missionary (Arunachal)*
- 23.. Thangchingmang Haokip, *Missionary (Moreh Meitei Field)*
24. Lunminthang (Abraham) Touthang, *Missionary (Sugunu Meitei Field)*
25. Lalminlun Kipgen, *Missionary (Sherou Nepali Field)*
26. Sobha Singh, *Missionary (Tamu-Myanmar Hindi Field)*
27. Ngaijalhing Kipgen, *Evangelist Teacher, Govajang, KBC No. 11*
28. Haopu DOUNGEL, *Waiting*
29. Lalkhohao Kipgen, *Waiting*

SHALOM THEOLOGICAL SEMINARY
 Gamnom Sapormeina
 Kangpokpi District, Manipur

Shalom Theological Column



ADMISSION NOTICE

Shalom Theological Seminary invites applications to undergo Theological Training for the academic year 2020-2021 for men and women who are committed to serve the Lord. The seminary offers Bachelor of Theology (B.Th) course.

Course Duration	: Three (3) years
Eligibility	: 10+2 (Class xii passed – 2020 class xii Exam appeared students can also apply)
Last date of form submission	: 20th May, 2020
Date of Entrance Test	: 29th May, 2020 (<i>Scripture knowledge, Eng, G.K</i>)
Academic session starts	: 18th June, 2020
Fee structure	: Rs. 35000/- (<i>Rs. thirty five thousand</i>) only per year (<i>Including admission fee, monthly tuition fee & mess fee, etc</i>)

Application forms can be obtained from the Academic office of the Seminary (Gamnom Sapormeina) or office of the Kuki Baptist Convention (KBC Office – Receipt & Issue desk/ P.A to G.S) from 1st April, 2020 on all working days on payment of Rs 100/- (Rupees one hundred only). The duly filled application form can be submitted to the Academic office of the Seminary (Gamnom Sapormeina) or office of Kuki Baptist Convention (KBC Office - Receipt & Issue desk/ P.A to G.S) between 10 am to 2 pm on or before 20th May, 2020.

Scholarship available on need based.

The Seminary is seeking affiliation to Senate of Serampore.

For further details please contact

Director - 9089593092/ 7005525033 Or haokip009@gmail.com

Academic Dean - 7005017150/ 8131066477 Or singseigyn@gmail.com

Rev. (Dr) Haoneo Haokip
Director, STS

HOUIN KAI DING DAN THUA HETSAHNA

Novel Corona Virus (Covid – 19) natna akon mipite kivendohna ding'a Prime Minister Modi in March 24, 2020 jankim apat April 14, 2020 chan India pumpi mipi kikulkhupna (Lockdown) aphondoh toh lhon in, eima eima umna mun cheh'a nit cheh'a kiven cheh ding in pha akisa'n ahi. Hitobang dinmun ilhuntah jeh'un Pathen houkhomnaho jong atongkhatan ahi. Hinlah, mihem jousen damna le damtheina kitihi Pathen in eiteppeh'u hinkho alhinkahsea ingaichat pen'u leh akhohpen khat ahi. Hijeh chun hiche Lockdown sung'a Pathen hou ding dan hou thudol'a kimanchah ding dan phabep anoiya bang hin ahung kitahlang in, houbung mite in ana jui cheh ding in hetsahna le temna ahung kineiye.

1. Natna hit akon kivenbit/kivendohna ding'a lampi phapen tua umsun chu mipi kititkhomna/kipunkhomna munhoa kon'a kikangse ding, chedoh /vadoh bollou ding ahi.
2. Hapta sung'a kaikhomho hi Lockdown sung'a um lou ding ahitai. Ahinlah hiche kaikhom phat sung hi eima eima imun cheh'a taokhomna/maicham semna'a nei cheh ding ahi.
3. Sunday jingkah Houkhom (Devotion) 7:00-8:00 am/cm hiding. Nilhah Houkhomna 5:00-6:00pm/cn hi ding ahin, Sunday School phat a hi eima cheh in S/S/ material (hilchetbu) ineiho inmuna kisim cheh ding ahi. Houkhom kipat ding tengleh houin lhacha (chowkidar) in Houin dah/pung avoh ging ding, eima imun cheh'a Pathen houkhomna nei ding ahi.
4. Thinglhang'a um houbunghoa houkhomnaho Gambih Pastor/Church Pastor/Head Deacon maikaina'a Deacon Board in agontup ding. Houkhom phat kipe sung'a gontupsa le ngansena changho (Bible simphong, la lamkai le Pathen thua houlimnaho) mipi in ajah thei ding'a Mike a ahinlha ding'u. Pathen thudol hihen Houbung mite tilkhouna thu hijongleh phatecha kigotna aneiding, phat sao behseh lou ding ahi. Hichea thusei

dingho hin mipi lunglinglaona ding le hetchenlou thulamling leho asei lou ding'u ahi.

5. Phai/khopi sung'a um houbunghoa houkhomnaho Church Pastor/Head Deacon maikaina'a Deacon Board in agontup ding. Sound System le Technician kitupna munhoa phatah'a Recording umsa ding technician in Houbung Facebook, YouTube le Whatsapp group'a live abolding.

6. Live a houkhom umtheilouna hoa houkhom sung'a sim ding le sah ding chule thumunho ma tahdoh ding, aphot sung'a thu kisei le la kisaho Video le Voice Record bol'a ol jep jongleh mipi ding'a ahin lha ding'u ahi.

7. Houkhom phat kipe sung'a gontupsa le ngansena changho (Bible simphong, la lamkai le Pathen thua houlimnaho) mipi jah thei dinga'a Mike/Internet mang cha'a ahinlha ding'u. Pathen thudol hihen Houbung mite tilkhouna thu hijongleh phatecha kigotna neiding, phat sao behseh lou ding ahi. Hichea thusei dingho hin mipi lungling laona ding le hetchenlou thulamling leho asei lou ding'u ahi.

8. Houin sung'a kimangcha dingho in ahithe channa lut le pot a khut kisop theng cheh'a chule ahithe channa Hand Sanitizer man ding in apha'n ahi.

9. Hiche phat tep sung'a hi insung cheh'a phatecha toukhom ding, koima kholai vahle umlou ding; Bible, Labu le angaicha adang gotsa kikoisoh keiding. Koima Mobile tham/ kichem/call bol umlou ding, TV ve umlou ding, Mike/Internet a thu kisei ngaicheh ding.

10. Mic/Internet akon'a Bible simkhom ding hihen La sahk-hom ding hijongleh ahung kiphon tengleh eima inmu cheh'a kiphohdoh'a simkhom le sahk-hom cheh ding ahi.

11. Maicham chom chom hihen, Som'a Khat, Anche-Louhing chuleh nehseh Anchang hileh akitoikhom ding jouse jong hiche phatsung'a chu eima insung taokhomna'a koidoh/ luoidoh ding ahin, Houin mun'a phat chaina Pathen heng'a taona aneiteng mopo penchun hiche akitoihdoh jouse jong-

chu lhandohna aneitha ding ahi. Hiche akito khom jouse chu Houkhom akichai tengleh Houbung Secretary makaina'a lamkai khat le ni in ahindon khomding. Ijemtia donkhomna ding'a ahahsatna aumleh eima eima in'a phate keicha'a koitup chet ding, Lockdown kichai tengleh lamkaiho khut'a peh ding ahi.

12. Houkhomnaho hi eima inmun cheh'a taokhomna a chai cheh ding ahin, 2 Chronicles 7:14 mang cha a

(a). Covid-19 natna abeina ding le eiho jouse ikivendohna ding'u

(b). Adamlouho adamdohna ding'u

(c). Natna jeh'a thiho insung mite ding

(d). Chassad kho mite ding

(e). Ichonset phong'a Pathen ang sung'a kipehlutna a itao cheh ding'u ahi.

13. Koi tobang Sermon le tilkhouna atumbek'a ngaicha aum leh mun dang le midangho kom'a hilouva phat jousea KBC Office mun'a doh/kilah jing thei hiding ahin, thuhil lhem akon kiven jing ding ahi.

14. Hiche Lockdown sung'a Department, Gambih, Houbung le Insung thudol'a Pathen thua kititkhomna ding programme semsaho (Conference, Seminar, Taokhomna, Kilhahhna, Kichenna, Jubilee le adang dangho) jong akhoh dungjuiya vohchon cheh ding ahi.

Phat chomkhat mipi houkhomnaho khongai ding kitihi Pathen tahsan lel na hilouva Pathen in kho hetna eipehnau mang cha a kiven na joh a ilah cheh ding'u vin temna ahung kineiye. Bible ajong vannoiya gimna hise le analan ji tengleh Pathen in amite chu insung'a akikulkhup ding uvin thu anape jing in ahi (Genesis 7:13-24; Exodus 12; Isaiah 26:20).

"Pathen chu eiho ding'a kisel na le thahatna ahin, genthei hesoh pettah a eipanpi ahi." – Psalms 46:1

Pakaiya na tokhompiu,

Rev. Dr. M. Thongkhosei Haokip, Gen. Secretary, KBC

AN APPEAL LETTER TO ALL KBC CHURCHES

Achesa nisim 16th March 2020 nikho a Kamjong miten Chassad khopi a nei le gou chuleh inn jani (200) ahal lhah utoh kilhonin khomiten neh le chah sil le chen gentheina tampi ana to thu mijousen ihetauvn hijeh chun office langa konin Houbung mite pan lahding dan lunggel khomna akineiijn ahi. Hou-Inn kisah pat laiija jong achen khompi hon "Na Hou-Inn sah uva hi nakai man diu himam?" tia ana hou sau ahi.

Tua lhangpia Chassad Khopi re-building thupi mangcha a Kuki Inpi, KKL, KSO chuleh Organisation dang dang chung chona a Houbung ho panlah khomna hohi akiven kipa um akisan ahi. Hiche a hin alhangpia inn kihal ho sahdohna ding Kuki Inpi leh State Government in aboipi in, School leh themjilna mun ho KSO in aboipi uvin chuleh genthei hahsatna, relief ho KKL mopohna dol in lamkai hon ngensena anei tauvin ahi.

Hiti ahi jeh chun KBC Houbung miten jong tumasangin ijochan uvin Chassad Khopi kithopina relief ho ihinpe tauvin, Pathen ithangvah uvin, kipa thu jong isei uve. Tuban a jong Chassad Khopi gelkhohna jal'a kithopina hinpe dinga kigel'a tampi ium nalai diu jong tahsan aum in, hijeh chun Houbung mite leh changval hihen insung mite hijong le tepna hung kinei nom chu Chassad Khopi re-building ache jom jing toh kilhonin tutua Church Building Construction ache jing lai ahitoh kilhonin tua pat a hi Church Building sahdohna dinga ijo chan uva kithopina ihin peh diuvin Pakai minin temna kahin neiijn ahi. KBC Assembly kiphatsahna dungjuijn General Account a kon'a Rs.10 Lakhs budget aumsa aum in, hiche bou a hi kijou louding ahin, Rs. 20 Lakhs beh kingaicha be dinga aun jeh in eihon jong ijokham cheh u, kithokhom leu hen Hou-Inn jong sahdoh a umthei ding ham tin lunggel akinei tan ahi.

Hijeh chun KBC Houbung miten akisaban Hou-Inn khu tukum sunga agangthei lam'a sahchai ahina dinga eima eima Houbung kiphalna dungjui cheh a special Fund Drive/ Donation ihin bol uva, KBC Office lam'a Developoment Committee ho kom'a ihin pehlut cheh diuvin temna leh hetsahna kahin neije.

LHAGAO HINKHO PUI HING THEI THUGOLHO

01. Na hina le ipi na hung hi ding na tup chun na sum man dan le hol dan chule manchah dan nasatah a asuhkhah ding ahi.

02. Leisetna ka hin jeh'a kei jeh'a mi khat beh in phatchom-na anei theina ding in hinkho mang ing'e itiuleh ihinkho-man dan uhi dih ding ahi.

03. Nitin hinkhoa na hindanho ahina ding bang na mandoh ding hi athupi ahin, na phat neiho phatea man ding tia na boipi sang in nahin dan kisuh dih le chun na lolhin ding ahi.

04. Niseh lehen Janauary 1 nikho bang bang in hing jingle-chun December 31 chu ana lolhing ding ahi.

05. Hinkhoa ibolhou, ineh hou le ichondan hou hi itahsau le ilungthim uva ana umsa kiboldoh ji bou ahi.

06. Monday apat Sunday nikho changeiya na thilbolho jouse hi Pathen angunga Account khat kihong ahin, hichea chu um cheh ahi.

07. Mi tamtah hi, asum tam dan, akum tamdan le athep dan'a thu kitan ahi, Pathen invang iti kibol em chule ipia kimang cha em tia thu atan ding ahi.

08. Hiche leiset hinkho hi chomcha sung'a natoh (Home Work) ibolnau ahin, hiche natoh chu Tonsotna kisim ding ahi.

09. Mihem mitmu na toh hi ahoi ding, aphot ding, angei ding le aminthan ding akidei cheh in ahi, Pathen mitmu invang Christa lunglhaina'a bol ding chu ahipen in ahi.

10. Vannoi leisetna bol ding hetalouva hinkho na man khah le avangse pen khat na hi ding ahitai.

KUKI CHRISTIAN-HO THUSIM'A **AMASAPENHO** (Lhakit leh banjom ding)

1. Kuki Baptist Christians Baptist houbung lah'a Revival hun-glut masatnapen chu 1923 kum a Makokching houbung anal-hung chu ahi.
2. Ukhrul Mission Centre chu 1919 kum in Kangpokpi a ana-kichonlut in hichea lamkai chu Dr. Crozier te nupa ana hilhon e.
3. Kangpokpi Mission Hospital phutdoh le Doctor masapen chu Pu Dr. Crozier anahi.
4. Kangpokpi Mission Hospital a Compounder masapen chu Pu Horeb Garo le Aban Babu Garo ahilhon e.
5. Kangpokpi Mission School a mihil (Oja) masapenho chu- Pu Prom Singh, Pu Angom Meitei, Pu Seilut Singson, Pu Tongngul Gangte anahiuve.
6. Kangpokpi Mission a Nu le Pa neilou (Orphan) anakivahdoh masapenho chu- Pu Ngulkhopao Ngailut, Pu Tongkam Kipgen, Pu Ngulboi Dimngel anahiuve.
7. Manipur Baptist Christian khoppi (Fellowship) masapen chu 1917 kum in Ukhrul mun a ana kibol chu ahi.
8. Tamenglong gam'a Zeliangrong mite lah a Houbung kiphutdoh masapen chu Pu Helkhup Chongloi lamkaina a 9th September 1923 nikhoa kiphutdoh Sempang Baptist Church chu ahi.
9. Manipur Lhumlam gam a Kuki le Naga akiloikhomanau Khoppi masapen chu 1923 kum a Manipur Baptist Christian Association lamkaiho lamkaina ana kibol "North West Baptist chu ahi.
10. North West Khoppi masapen 1925 kum in Tujangvaichong Houbung mun a anakibol e.

Taona Column

TAHSA DAMMO

TAONA LE KITHOPINA NGAICHA

Pastor Limminthang Zou, Pallel Molnoi, KBC Gambih No. 16 in 2019 kum bul apat in kal (Kidney) natna ana neiyin, RIMS Hospital Imphal mun'a phat sottah akijen nung in kal suhthengna (Dialysis) ahung kibol toupeh in ahi. Ama khohelouva akijen jinglai in apenna anu in ana dalha kit in ahi. Tuni chan in insung gentheinaho thoh pum in adammona akon damtheng thei louvin akijen jing in ahi. Pathen lenggam na atohna kalsongbe thei talou le insung dinmun machal thei talouva aum jing lai in houbung mite in Pathen heng'ah taona in kop jing ute. Chule s sumlepaiya panla thei thei injong ijo kham kham uva ikithopi thei u ahi. (Tuletua aumna Molnoi Pallel, Mobile Number – 8730957656 | UTBI A/C No. 0256010834544. IFSC Code. UTBIO-KAK345).

(‘Tahsa Dammo’ kiti hi KBC sung ahilouleh Christian sung’a taopehna le kithopina ngaichaho tahlangna ding’a hung kisem ahi. Hichea taona ngaichaho in Jt. Editor Mobile Number 9862107393 a Whatsapp a hin thot lut jing thei ahi. Ahung kithotho chacha hung kiso ding ahitoh lhon in taona ngaicha ihet hou thot lut cheh ute.)



Reports

Centre Church Thudol Hetna

CHASSAD KHOPI KIHAL LHANA CHUNG'A KBC IN POHNATNA THUPHON LE TEMNA NEI

Achesa nisim 16 March 2020 nikhoa Chassad Khopi kihal lhahnaa mihem tamtah in gentheina sangtah anatona chung'a Kuki Baptist Convention (KBC) in sangtah in lainat pina le pohnatna akineiyin ahi. Pao le ham chom jep jep kihi jongleh Christian tahsanna'a Baptist insung chule phat sottah hung chengkhomho kah'a boina hung lhung hi deimo um akisa'n ahi. Thule la boina um jongleh Christian tahsan dungjuiya ngailutna thua seicham tho louva in le lou, school le thil le lo jouse changeiya hal lhahna aum hi vangset um tah in aki-gel in, dihmo akisa'n chule sangtah in demna akineiyin ahi. Hiche chungchon in akho mun'a kelngoiching'a pang, Pastor Mangjapao Haokip, Pastor, KBC Centre Church, Chassad gari Ecco Van, MN06L 8809 jong khenlouhel'a ana kihallhah chu Pathen natongho kijabol louna injong akila'n nasatah in pohnatna le demna thu ahung kiphong in ahi.

Hiche toh kilhon in KBC in hou thudol toh kisai in agangthei pen in ana kidellut in, khosung mite le houbung mite lhamonna le taopehna ana kineiyin ahi. Chule mun chom chom'a houbungho: KBC houbungho, CKWS, MBC, ETNBA, NTNBA, WTNBA chule adang dangho le kiloikhomna chomchomho: KIM, KSO, KKL, KWU, HYA, MYA, ZSP, GSO, GPO, HPC, TYC, ZYO, COCOMI, YVA, ZILLAI, ZYA, ZMA, TSA, ATSUM, EDA, ZORO, KCC(M), YMA chule adang dangho in taona to thoa panpina jatchom chom ahin peh jingnau hi khat le khat kingailutna sangtah in atahlang in, lam chom chom'a pan hinlaho jouse chung'a sangtah in kipa thu ahung kiphong in ahi. In le lou

nei talou, gentheina sangtah toh Chassad khomite ding'a taona le panpina chule kithopina'a panlah jom jing ding in mipite Pathen min in temna ahung kineiyein ahi.

Hou (Church) lam'a gamsung le gampam akon Chassad Kho-pi kithopina le panpina ding'a Relief ahung jing toh Ihon in phatea vettup angai toh Ihon in KBC in mopohna nei ding in KBC Development Committee ngansena akineiyein, KBC Office, Imphal mun'ah Chassad Relief Office akihong tan ahi (2213/CEC-KBC/2020). Koi tobang houbung (church) le sakho (religious) lam akon panla nom jouse in Development Committee toh kijahmat'a Relief Office a hung thah ding in temna le lemna ahung kineiye.

Chassad mun'a Houin khat akisah jinglai ahin tupet tah'a Pathen houna ding jong houin umlou ahijeh in hiche houin sahdohna ding in Nehemiah 2:17-18 a Jerusalem Kulpi sahphat kitna ding'a ban tha ana jetkhom bang uvin muntin'a houbung le mimal hon jokham kham sepkhom'a taona toh thoa pan hinla cheh ding in Pakai min in temna sangtah ahung kineiye. Munchom akon sum hinthot nom hon, noi-ya Bank Account kipea hi thot thei ahi. Hou thudol'a Relief chung chang'a na kitongho phatah'a ki boipi ding ahin, aphot cha cha hung kitahlang (Update) jing ding ahi.

Contact : Rev. Onkho Haokip,
Development Coordinator – 9862107393
: Dr. Seilenkap Haokip,
Asst. Coordinator - 8413034697

Bank Account:

Kuki Baptist Convention

Indian Overseas Bank, Imphal Branch

A/c No. 073201000000350, IFSC No. IOBA0000732

HUMOUR WITH TRUTH

DONT CURSE THE CORONAVIRUS



- It has brought back humanity.
- Brought back people to their Creator and to their morals.
- It has closed down bars, night clubs, brothels and casinos.
- It brought down interest rates.
- Brought families together.
- It has stopped people eating dead and forbidden animals.
- So far it has moved one third of military expenditure to health care.
- Arab countries have banned shisha.
- Coronavirus is pushing people to prayers.
- It undermines dictators and their powers.
- Humans are now worshipping God rather than progress and technology.
- It is forcing authorities to look at its prisons and prisoners.
- It has taught humans how to sneeze, yawn and cough.
- Coronavirus is now making us stay at home, living simple lives.

We thank God for waking us up to reality and for giving us an opportunity to ask Him for His Forgiveness and His help.

CHASSAD RELIEF

KBC OFFICE A HUNGLUT-HO

(As on 31st March, 2020)

Panpi ngaite panpina ding'a pan hilaho jouse chung'a kipa thu iphong uve. Chule mailam'a ajong pan la jom jing ding in Pakai min in tem ihuive.



1. Dr. Hawngam	₹ 1,000.00	16. C/C Lamphel	₹ 8,200.00
2. Dr. Ngamkhokhai	₹ 1,000.00	17. HQ Nute Maicham	₹ 280.00
3. Pa Jamdou	₹ 700.00	18. C/C Game Village	₹ 5,000.00
4. Pr. Haopu	₹ 500.00	19. Game Village	₹ 1,100.00
5. Rev. Thongkhonun	₹ 500.00	20. C/C Canan Veng	₹ 5,000.00
6. Ng. Chongneo	₹ 500.00	21. C/C New Lambulane	₹ 18,000.00
7. Pr. Thanggoumang	₹ 500.00	22. Nu Chingneichong Moreh	₹ 1,000.00
8. M's Sherlyn Lhingpineng	₹ 1,000.00	23. Pa Paojalen Haokip	₹ 1,000.00
9. Nu Vahboi Baite	₹ 500.00	24. Pr. Mangkhon Kipgen	₹ 500.00
10. Pr. Seikhon Kipgen	₹ 500.00	25. Rev. Henjalen Doungel	₹ 500.00
11. Pr. Thongchinglen Touthang	₹ 500.00	26. C/C Hill Town Ccpur	₹ 20,000.00
12. Ng. Chongneithem Haoikip	₹ 1,000.00	27. Pr. Seikhogin Haokip	₹ 700.00
13. C/C Haokip Veng	₹ 15,000.00	28. Gl. Haoneo Baite	₹ 500.00
14. KBC Office	₹ 15,000.00	29 Pr. Ginneo Haokip	₹ 500.00
15. C/C Langol	₹ 35,500.00	30. Salom Theo. Seminary	₹ 1,000.00

CHAHSAT VANGKHO



31. Pr. Letminlal Khongsai	₹ 500.00	41. Gopibung Baptist Church	₹ 1,000.00
32. Gambih No.16 (Pallel Molnoi Area)	₹ 55,050.00	42. Pr. Thangminlal Haokip	₹ 500.00
33. Rev. Lunkhosei Tuboi	₹ 500.00	43. C/C Tuibong	₹ 22,000.00
34. Pa Jangpao Haokip & Family	₹ 500.00	44. C/C Sangaikot	₹ 5,000.00
35. Centre For Women & Girls	₹ 7,000.00	45. Sangaikot	₹ 1,400.00
36. GB No. 15, BYD Canan Veng,	₹ 5,000.00	46. Rev. Onkho Hoakip	₹ 1,000.00
37. C/C Chassad Avenue	₹ 16,000.00	47. Gl. Thangkholum Singsit	₹ 1,000.00
38. Pa Ngamkhomang, B. Vengnom	₹ 10,000.00	48. Pi Kimneihoi, Khopijang	₹ 15,000.00
39. C/C Kangpokpi	₹ 65,000.00	49. KWS Chennai	₹ 90,030.00
40. Maohing Baptist Church	₹ 6,000.00	50. KWS Itanagar	₹ 50,500.00

TOTAL ₹ 489960.00

Koi tobang Chassad Relief akithopina penomho in noiya Bank Account hi manchah jing thei ahi.

Bank Account:

Kuki Baptist Convention

Indian Overseas Bank, Imphal Branch

A/c No. 073201000000350, IFSC No. IOBA0000732

Gambih Thudol Hetna



Achesa Dt 19-03-2020 nichun Jangnoi Houbung Chu KBC Gambih No 15 a ding in lahlut naleh Hoi In athenso na Rev.Thanglen Haokip Gambih Pastor in apa acha chuleh Lhagaothen min in Phondoh na ana nei tan ahi.

Khotona Thilpeh

Tuni nisim 28/3/20 jingkah chun S. Kanan C/C. aum KBC No.8 W/ Deptt.in Lydia Resource Centre(LRC). aum hokhohsah najallin Rice 50 Kgs. Milk 1 Kg. leh Sugar 1Kg ahung peuvin ahileh neh leh chah



a kel leh chah thua meisan vegeh aum laitah a thilpha bolna lama malphatah ahung pannaoh chungah KBC, India W/Deptt. thakhellin kipathu kahinsejin ahi.

DAMMONA KILALASON THEIHO AKON KIVEN DING DAN

1. Dammona kilason theiho akon kivenna ding in itobang natnaho chu kilason theiham chule eti kilason thei ham het angai masape'n e.
2. Natnaho chu ama nat na hit dungjuja kiven na jong um ahi. Vetsahna in HIV natna hi akilason thei hijongleh Syringe mang kop lou ding chule thisan kitimat lou ding ahi. Uithah (scabies) natna neiho toh von kikop lou ding ahi. Chule tahsa kisuhtheng jing ding ahi.
3. Dammona kilason thei ijat hamkhat hi kivenna lou (vaccination) akibol leh akihoidoh theiyin ahi. Ahinlah HIV natna vang tuni chan'a kivendohna thei louleai (vaccine) kisemdoh loulai ahi.
4. Tu le tua kisei gimnei le vannoi hotling sohheh Corona Virus kiti jong hi akivendohna ding loileai (vaccine) kisemdoh lou lai ahi.
 - *Corona Virus hi akivendohna thei loileai kisemdoh hih lai jongleh mihem in eima le eima hetna le kichih theina akon in akikiveng thei in ahi.*
 - *Twi le Sabon ahilouleh khutsop thengna ding'a kitem louleai a khut kisop theng jing ding ahi.*
 - *Corona Virus natna le akilason thei natna nei aumleh ama chu kiven ding ahin, achit ham akhut ham tengleh amuh chu ulthepon ahilouleh akhut a akitom ding, achil hihen, ulthepon hileh apaimang ding tengleh nenkholna mun'a kitup tah'aapai mang ding ahi. Nen bo apanghon jong khut tom akitom jing ding u ahi.*
 - *Insungho jong bangkot (window) hon jing ding, ahithe channa nisa vah kholut sah ding ahi.*
 - *Insung'a thil le lo kineho (Furniture) hihen lang Computer le Mobile Phone hijongleh twi sehseh hilouva natna hit that theihua suhtheng jing ding ahi.*
 - *Natna neiho in muhtom (mask) kitom jing ding ahi. Adamho injong adammoho ajen teng uleh muhtom akitom ding'u ahin, hichu muhtomho chu khatvei kal val man lou in aphan, iman chai tengleh kituptah a nenkholna a pai ding ahi.*
 - *Sarkal (Govtment) in bol ding'a thupeh (kivenna ding'a guide line abolho) jui ding ahi.*
6. Dammona kilason theihua kon kivendohna ding'a Pathen heng'a tao jing ding ahi. Chule tahsa natna sehseh hilouva chonset natnaho akon'a jong kiven jing ding ahi.

~Dr. Paokai Kipgen, RIMS, Imphal

Obituary

LUNGHEMPINA THUPHON



Pu. Seikholet Touthang

DOB: 1942

Village : Pashong Village,

Ukhrul District Manipur

Expire on : 21st March 202



UPA. S Jamkhotong Haokip

Apen ni 15 the April 1947

Baptized 25 the may 1964

Athini 30th March 2020 9.30 am

*Gelpah louva Nisim 21 March 2020 nikhoa Pashong kho-
mun a um Pu Seikholet Touthang eiho Pastor pu Thongchin-
len Touthang apenna apa in eina mollem san nau chung
ah lunghempina le insungmite pohnat khompina thuphon
ahungkineijin ahi,*

*Chuban ah 30 March nikhoa Pu S. Jamkhotong Haokip
eiho Pastor pu Pastor S. Hemkholen Haokip apenna apa
in achenna mun Thingjang khomun ah eina dalha kit uvin,
Lamkai ho in kilometah in lhahna pon jong ana kikhu cheh
tan, Ngaito phah louva lhahlal umtah pate ni in ena dalhah
nau chungah Pathen program joh himaijintin, Muntin a
houbung miten itaonau va geldoh cheh utin, adalhah insung
mite jouse Pathen in lungmon lhamon na peta hen.*

KBC Thuso Editorial

Since 1760

Report

Lewis Berger
Paint your imagination



CRYSTAL
REFLECTIVE
TECHNOLOGY

*Tu le tua minchetah chuleh tumasanga
Howin leh chenna in tampi
hoitah tah paint hinbol
aman jong midang sanga
kihoupri nomjo
Gauhati a kon hung kipan a
Kolkata a kon natong ho
mi kila chuleh*

Lunginmang Haokip,

+91 70055 80496

Gangpijang Special contractor

*noiya kitong hi gamsunga kitobanga angaicha leh
atohsah nom aumleh phattin a houpri jing thei ahi.*





Post Regd. MNP/81
Regd No. 18134/88



KBC Foundation Day

If undelivered, please return to
The Editor. KBC Thuso
KUKI BAPTIST CONVENTION
Opp. DM College, Imphal - 795 001
Contact: 9862633173